

**Sanaartornermi neqerooruteqartitsisarneq pillugu
Inatsisartut inatsisaata
allannguuteqartinneqarnissaanik Inatsisartut
inatsisissaat ("Kalaallit Nunaanni sanaartornermi
sulianut pilersuiner Mullu ataatsimut piumasaqaatit"
(AP) atornerqarnerisa erseqqissarneqarnera.
Neqerooruteqartitsisarnermut Maalaaruteqartarfup
naammagittaalliutinik suliaqarnermini
katitigaanera. Neqerooruteqartitsisarnermut
Maalaaruteqartarfup aalajangiisinnaatitaaffinik
annertusititsineq.)**

§ 1

Sanaartornermi neqerooruteqartitsisarneq pillugu Inatsisartut inatsisaanni nr. 11-mi, 2. december 2009-meersumi imatut allannguisoqarpoq:

1. § 7-imi imm. 4-p kingorna immikkoortoq nutaaq ataaseq ivertinneqassaaq:

"Imm. 5. Neqerooruteqartitsineq AP malillugu ingerlanneqarpat, tak. imm. 4, AP-mik saneqqutsinissaq taamaallaat tunngavissat immikkut ittut pineqartillugit pisinnaavoq. Saneqqutsinissamut aalajangersakkat pisuni ataasiakkaani neqerooruteqartitsisarnermut najoqqutassiani erseqqissarneqartassapput."

2. § 27-mi imm. 1-ip kingorna immikkoortut marluk nutaat ilanngunneqassapput:

"Imm. 2. Suliani ataasiakkaani aalajangiinermi siulittaasoq ilaasortallu sulianik ilisimasallit marluk peqataassapput, taamaattoorli tak. imm. 3. Neqerooruteqartitsisarnermut Maalaaruteqartarfup siulittaasuata, siulittaasoqarfimmi ilaasortat ilaasortallu sulianik ilisimasallit, suliami aalajangiinermut peqataasussat amerlineqarnissaat aalajangersinnaavaa."

Imm. 3. Neqerooruteqartitsisarnermut Maalaaruteqartarfup siulittaasuata ilaasortanik sulianik ilisimasalinnik peqateqarani suliat allakkatigut tunngaviliilluni aalajangiiffigineqarsinnaasut, imaluunniit tunngaviusunut aalajangiisusnaanngitsut aalajangiiffisinnaavai, kiisalu suliat ingerlanissaannut apeqquutit aalajangiiffiginnaallugit."

Tamatuma kingunerisaanik imm. 2-4 imm. 4-6-inngorluttinneqassapput.

3. § 30-mi imm. 1-ip kingorna immikkoortoq nutaaq ilanngunneqassaaq:

"Imm. 2. Neqerooruteqartitsisarnermut Maalaaruteqartarfup suliaq itigartissinnaavaa imaluunniit

tamakkiisumik ilaannaasumilluunniit aalajangiiffigisinnaallugu, tassungalu ilanngullugu inatsisinik unioqqutitsilluni aalajangiinerit imaluunniit neqerooruteqartitsinernik suliaqarnerit atorunnaarsissinnaallugit imaluunniit suliakkiisoq neqerooruteqartitsinermik suliaqarnerminik inatsisinut naapertuuttunngortitsinissaanik peqqusinnaallugu.”

Tamatuma kingunerisaanik imm. 2 imm. 3-inngortinneqassaaq.

§ 2

Inatsisartut inatsisaat 1. juni 2011-mi atuutilerpoq.

Kalaallit Nunaanni Namminersorlutik Oqartussat, ulloq 15. april 2011

Kuupik Kleist

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut